

Nowodhow an Seythen

01/04/2009

Lowen ov vy dhe dherivas dhywgh yma meur a nowodhow da rag an yeth Kernewek y'n seythen ma.

Mar mynnewgh hwi dannvon agas flehes dhe vagas-gwari diwyethek Kernewek-Sowsnek may hallons dyski hag usya an yeth pub dydh oll, yma nowodhow meur dhe les ragowgh. Conan Jenkin ha Rhisiart Talebot re fondyas movyans nowyth henwys *Movyans Skolyow Meythrin*, a hevel bos kehalval orth skolyow diwyethek Manow ha Kembra yn y dowl ha'y vethodys. Herwydh aga gwiasva y fydh an kynsa bagas-gwari ygerys yn Truru yn nessa hanter an vledhen ma. Rag kavos pella derivadow, mirewgh orth www.movyans-skolyow-meythrin.net.

Bagas a Gernewegoryon re sonskrifas kynsa rann an gwari mir *Origo Mundi* rag Plen an Gwari fugwir avel rann an projekt *Theatron*. Jori Ansell, Pol Hodge, Jerry Jefferies, Frances Bennet hag Elizabeth Stewart re ros aga levow dhe garakters an gwari avel Deus Pater, Adam hag Eva. An rekordyans ma a vydh kesunys gans gwelyekheans Plen an Gwari Porth Pyran war selven *Second Life* may hyll studhyoryon gwariva y usya heb kaletter.

Wos'tiwedh y hwrug an governans ystynna arhesans MAGA rag an dhiw vledhen a dheu. Ni a wayt may hyllyn ri dhywgh moy a vanylyon a-dro dh'aga thowlow ha projektow an nessa gweyth.

Yn bys an sport, y fythas Leeds Carnegie an Vorladron Gernewek tri ha tregons dhe naw. Brett Davey, kevarwedhyas an Vorladron, a vlamyas an breusor, Llyr Ap Geraint Roberts, rag an skor euthek ma yn unn leverel bos y obereth "ogas hag ankombrys".

Hemm yw oll rag an seythen ma. Lowena dhywgh!

Geryow nowyth

gwelyekheans (n.) = *visualisation*

fugwir (adj.) = *virtual*

selven (n.) = *[software] platform*